

Dumonda Michael (Castasegna) concernent la reorganisaziun da la polizia chantunala en la subregiun Engiadin'ota / Bregaglia

En il decurs dal mais da december 2018 èn las vischnancas da la subregiun Engiadin'ota / Bregaglia vegnidas infurmadas davart la reorganisaziun dal corp da polizia e davart il fatg che quella saja gia realisada.

La reorganisaziun dal corp da polizia cumpiglia la reuniun dals quatter posts da polizia existents en in unic post da polizia, per uschia realisar a lunga vista la finamira d'in unic post a Samedan. La reorganisaziun cumpiglia er las incumbensas polizialas communalas ch'èn vegnidas surpigliadas en enclegientscha cun differentas vischnancas. Actualmain èn las polizistas ed ils polizists repartids sin trais lieus a Silvaplauna, a San Murezzan ed a Samedan.

Questa decisiun, che n'era betg vegnida communitgada e coordinada ordavant, ha chaschunà differentas protestas, ed en intgins cas èn schizunt vegnidas desditgas las cunvegns da prestaziun concernent la surpigliada da las incumbensas polizialas communalas.

In fatg surprendent è ultra da quai ch'il territori da la vischnanca da Bregaglia ha pers il post da la polizia chantunala a Castasegna. Quel è vegnì remplazzà d'in biro che vegn utilisà mo occasiunalmain u tenor cunvegna, uschia ch'il territori da cunfin n'ha pli naginas polizistas e nagins polizists ch'enconuschan la regiun e sia populaziun. Tras questa decisiun demussa l'administraziun chantunala – en quest cas la polizia chantunala – ina giada dapli pauca atenziun e sensibilidà per las regiuns perifericas, sch'ella stritga plazzas da lavur ed eliminescha substrat social ed economic, cun in niz zunt dubitaivel per la regiun.

En vista a las ponderaziuns qua survart tschentan las sutsegnadras ed ils sutsegnaders las suandantas dumondas a la regenza:

1. Tgi ha decidì la strategia ed il proceder da la polizia chantunala?
2. Actualmain han gia duas vischnancas da l'Engiadin'ota desditg la cunvegna da prestaziun cun la polizia chantunala concernent la surpigliada da las incumbensas polizialas communalas, ed ulteriuras vischnancas pondereschan eventuels pass en questa direcziun. Tge consequenzas han questas decisiuns per l'organisaziun da la polizia chantunala?
3. Co intenziunescha la polizia chantunala da garantir la segirezza en questa regiun da cunfin, sch'ella n'è betg pli preschenta en quest territori e n'enconuscha betg ils acturs correspondentes?
4. Co po la polizia chantunala garantir sia preschientscha e la cuvrida da cas d'urgenza en Bregaglia, perquai che la colliaziun stradala è serrada regularmain ed adina pli savens pervia da privels da la natira?
5. Co intenziunescha la polizia chantunala da garantir che las polizistas ed ils polizists che patruglieschan en Bregaglia èn abels da communitgar en talian cun la populaziun e cun ina part considerabla da las participantas e dals participants dal traffic?
6. Pervia da la decisiun prentida vegnan er spustadas duas plazzas da lavur da la Bregaglia en Engiadin'ota. Quai cun la consequenza che naginas funcziunarias e nagins funcziunaris da la polizia chantunala vegnan ad abitar en l'avegnir en la vischnanca da Bregaglia e ch'ina regiun periferica daventa danovamain pli povra. Tge mesiras intenziunescha la regenza da prender per cumpensar la perdita da questas duas ulteriuras plazzas da lavur en questa regiun periferica?

Cuira, ils 12 da favrer 2019

Michael (Castasegna), Salis, Lamprecht, Aebli, Atanes, Berweger, Bondolfi, Cavegn, Clalüna, Crameri, Degiacomi, Della Cà, Fasani, Felix, Giacomelli, Hitz-Rusch, Horrer, Kienz, Niggli (Samedan), Noi-Togni, Pfäffli, Preisig, Rettich, Weidmann, Wellig, Locatelli-Iseppi, Lunghi, Spagnolatti